

आकाशवाणी

खबरां

1. प्रधानमंत्री नरेंद्र मोदी होरें आखेआ ऐ जे दुनिया दे कुसै बी मुल्ख नै भारत गी आपरेशन सिंदूर रोकने लेई नेई आखेआ।
2. इसरो अज्ज धरती पर ते धरती दे हेठ गतिविधिएं दी निगरानी आहले उपग्रह निसार दा प्रक्षेपण करोग।
3. राष्ट्रपति द्रौपदी मुर्मू होर अज्ज पच्छिम बंगाल ते झारखंड दा दौरा करडन।
4. इंकम टैक्स मैहकमे नै साफ कीता ऐ जे प्रस्तावित आयकर विधेयक-2025 कन्नै टैक्स दरें पर कोई असर नेई पौग।
5. अंतरराष्ट्री मुद्रा कोष-आई.एम.एफ नै 2025 ते 2026 लेई भारत दी विकास दर दी पेशगोई बधाइयै 6 इशारिया 4 प्रतिशत दस्सी ऐ।
6. रूस दे कामचटका समुंद्री इलाके च 8 इशारिया 8 तीव्रता दे भूचाल दे बाद सुनामी दा खतरा दस्सेआ गेआ ऐ।

<><><><><><>

LS-Operation

प्रधानमंत्री नरेंद्र मोदी होरें आखेआ ऐ जे विश्व दे कुसा बी नेता नै भारत गी आपरेशन सिंदूर गी रोकने लेई नेई गलाया। मोदी हुंदी एह टिप्पणी विपक्ष आसेआ पाकिस्तान कन्नै युद्ध विराम समझौते उप्पर अमरीकी दबाव च सहमति जताए जाने दे आरोपें बश्कार आई ऐ। उनें गलाया जे पाकिस्तान नै गै भारत गी आपरेशन सिंदूर गी रोकने दा आग्रह कीता हा, जे ओह हून भारत दी होर मार नेई झल्ली सकदा। प्रधानमंत्री होरें गलाया जे अमरीकी उपराष्ट्रपति हुंदे कन्नै गल्लबात दौरान भारत नै अपना रूख साफ करी दित्ता हा जे जेकर पाकिस्तान हमला करदा ऐ ते भारत ओहदा मूंह त्रोड परता देग। लोकसभा च सिंदूर अभियान उप्पर विशेष चर्चा दा परता दिंदे होई मोदी होरें आखेआ जे इस अभियान दरान भारत नै पाकिस्तान च जाइयै आतंकी शिविरें गी तबाह करी दित्ता। उनें गलाया जे आपरेशन सिंदूर दे जरिये भारत नै एह स्पष्ट करी दित्ता ऐ जे जेकर भारत उप्पर कोई आतंकी हमला हुंदा ऐ तां भारत अपने तरीके कन्नै ओहदा बनकदा परता देग।

<><><><><><>

RS-Op Sindoor

पहलगाम च होए दे आतंकवादी हमले दे परते च भारत दे सशक्त सफल ते नतीजाकुन आपरेशन सिंदूर पर राज्यसभा च बी खास चर्चा होई। रक्षा मंत्री राजनाथ सिंह होरें चर्चा दी शुरूआत करदे होई पहलगाम च 26 बेदोसे लोकें दी बेरहमी कन्नै हत्या करने आहले त्रै आतंकवादिएं गी जम्मू-कश्मीर च मारी मकाने आस्तै भारती सेना ते सुरक्षाबलें गी बदाई दित्ती।

<><><><><><>

ISRO-NISAR

भारती अंतरिक्ष अनुसंधान संगठन-इसरो अज्ज सिंथेटिक अपरचर रडार उपग्रह निसार गी अंतरिक्ष च भेजोग। एह इसरो ते अमरीकी अंतरिक्ष एजेंसी नासा दा सांझा मिशन ऐ। एहदे च नासा दा एल-बैंड ते इसरो दा एस-बैंड रडार लगगे दा ऐ। आंध्र प्रदेश च श्री हरिकोटा दे सतीष धवन अंतरिक्ष केंद्र थमां GSLV-F-16 राकेट दी मदद कन्नै इसी अज्ज संझा 5 बज्जियै 40एं मिनटें पर गासै च छोडेआ जाग।

इस मिशन दा उद्देश्य हर 12एं दिनें पर पूरी धरती ते एहदी अंदरूनी हलचल पर पूरी बरीकी कन्नै निगरानी रखनी ते निरीक्षण करना ऐ। एहदे नै जलवायु परिवर्तन, अनुसंधान ते आपदा कार्रवाई लेई बधिया क्वालटी दियां भलेआं स्पष्ट साफ फोटू ते डेटाबेस उपलब्ध होगा। निसार अपनी भलेयां नमी टेकनालजी ते प्रणाली राएं धरती दी सतह ते धरती ते हेठ दी मैपिंग करोग ते उत्थे होने आहलिएं गतिविधिएं ते प्रक्रियाएं दे बारै च वैज्ञानिक जानकारी उपलब्ध कराग। एहदे अलावा निवार दी मदद कन्नै धरती ते धरती पर मजूद बर्फू दे बड्डे-बड्डे प्हाड़ें-तोदें जिनेंगी ग्लेशियर आखेआ जंदा ऐ, उंदे च होआंरदे बदलाव दा बी निरीक्षण होगा।

<><><><><><>

## President

राश्ट्रपति द्रौपदी मूर्मू होर अज्ज पच्छिम बंगाल ते झारखंड दे 3 दिनें दे दौरे उप्पर होडन। अपने दौरे दरान राश्ट्रपति मुर्मू होर पच्छिम बंगाल दे कल्याणी स्थित एम्स दे पैहले दीक्षांत समारोह च शिरकत करडन। झारखंड च राश्ट्रपति देयोगड स्थित एम्स दे पैहले दीक्षांत समारोह च शामिल होडन। एहदे मगरा ओहू धनवाद दे आई.आई.टी दे 45में दीक्षांत समारोह च हिस्सा लैडन।

<><><><><><>

## Income-Tax

इंकम टैक्स मैहकमे नै आयकर विधेयक-2025 च टैक्स दरें च कुसै चाल्ली दे बदलाव सवां इंकार करी दित्ता ऐ। मैहकमे आसेआ पेश कीते गेदे विधेयक पर सफाई दिंदे होई उन्नै आखेआ ऐ जे इस पेशकश दा उद्देश्य छडी भाषा गी असान बनाना ऐ ते गैर जरूरी परानिएं बवस्थाएं गी हटाना ऐ। मीडिया दिएं खबरें च दावा कीता गेआ हा जे नमा विधेयक किश श्रेणिएं दे करदाताएं लेई लम्मी अवधि दे पूंजीगत फैयदें पर लाने आहले टैक्स दिएं दरें च बदलाव करोग। जारी अपनी सफाई च मैहकमे नै आखेआ ऐ कि नमा विधेयक मजूदा टैक्स ढांचे च कोई बदलाव कीते बिजन कर नियमें गी सखल्ला, टेकनालजी साब्वे साजगार ते मजूदा बवस्थाएं गी तरतीब देने दे मकसद कन्नै आंदा जांरदा ऐ। चेता होग जे नमा टैक्स विधेयक फरवरी म्हीने बजट सत्र दरान लोकसभा च पेश कीता गेआ हा जेदे मगरा इसी लोकसभा दी मते इख्तयारे आहली विशेष कमेटी गी भेजी दित्ता गेआ हा जिन्नै हाल च अपनी रिपोर्ट जमा कराई ऐ। एहू विधेयक कनून बनने पर 1961 आहले मजूदा इंकम टैक्स अधिनियम दी थाहर लैग।

<><><><><><>

## IMF

अंतरराश्ट्री मुद्रा कोष नै 2025-26 लेई भारत दी आर्थिक वृद्धि दे अपने पूर्वानुमान गी संशोधित करिये 6 इशारिया 4 प्रतिशत करी दित्ता ऐ। एहदे शा पैहले अपने अप्रैल-2025 लेई भारत दी जीडीपी वृद्धि दर 6 इशारिया 2 प्रतिशत ते 2026 लेई 6 इशारिया 3 प्रतिशत रौहने दा अनुमान लाया हा। दुनिया दी सबभनें शा तेजिया कन्नै बधदी अर्थ बवस्था दे रूप च भारत दी स्थिति दी पुष्टि करदे होई आई.एफ.एफ नै अप्रैल पूर्वानुमान दी तुलना च मते अनुकूल बाहरी वातावरण गी इस बाधे दा क्षेय दित्ता ऐ।

<><><><><><>

## Russia

रूस दे कामचटका प्रायद्वीप दे प्रशांत तट उप्पर अज्ज बड्डलै 8 इशारिया 7 दी तीव्रता दा इक शक्तिशाली भूकंप आया। एहू भूंचाल जेदा केंद्र तकरीबन 136 किलोमीटर दूर 19 किलोमीटर दी गहराई उप्पर हा, जपान च किश हिस्सें च सुनामी दी चेतावनी जारी कीती गई। रूस दे इस प्रायद्वीप च 3-4 मीटर उच्चियां लहरा उठने दी सूचना मिली ऐ ते लोकें गी तट शा दूर रौहने दा आग्रह कीता गेआ ऐ। जपान च प्रशांत तट उप्पर 1 मीटर तगर उच्चि लहरां उठने दी शेंका ऐ।

<><><><><><>

## UK-Palestinian State

ब्रिटेन दे प्रधानमंत्री कीर स्टार्मर होरें आखेआ ऐ जे जिसलै तोड़ी इज्राइल गाजा च लोकें दिएं दिक्कतें-परेशानिएं गी घट्ट करने लेई लोडचदे असरदार कदम नेही चुक्कदा ते हमास कन्नै संघर्ष विराम लेई सहमति नेही होंदा, बरतानिया, फिलीस्तीन गी इक बक्खरे मुख दे रूप च मानता देग। गाजा संघर्ष

पर उत्थूं दे केंद्री मंत्रीमंडल दी बैठका च स्टारमर होरें आखेआ कि जेकर इज्जाइल किश शर्ता पूरियां नेई करदा तां ब्रिटेन संयुक्त राष्ट्र महासभा अगो पैहले गै फिलीस्तीन दा बक्खरे राष्ट्र दे रूपै च समर्थन करोग।

<><><><><><>

## Sanchaar

संचार मंत्री ज्योतिरादित्य सिंधिया होरें हिंदी ते 21 क्षेत्रीय भाषाएं च संचार साथी मोबाइल ऐप दी शुरूआत कीती जेदे राएं बक्ख-बक्ख क्षेत्रें च एहदी पुज्ज यकीनी बनी सकोग। जनवरी शा शुरू होई दी इस ऐप दे जरिये उपभोक्ताएं गी संधिगद संचार दी सूचना देने, गोआचे दे या फी चोरी होए दे फोन गी ब्लाक या ट्रेस करने ते बिजन अधिकारी प्राप्त मोबाइल कनेक्शन दी जांच करने दी सुविधा देआ'रदा ऐ। इस ऐप गी 46 लक्ख शा मते लोकें डाउनलोड कीते दा ऐ। मंत्री होरें दूर संचार सरबंधी साइबर धोखाधडी दे खिलाफ यत्नें उप्पर विचार विमर्श ते उसी होर निगगर करने लेई नमी दिल्ली च आयोजित हितधारकें दी बैठक दरान इसी शुरू कीता।

<><><><><><>

## IMD

भारती मौसम विभाग नै अज्ज बिहार, पूर्वी राजस्थान, हिमाचल प्रदेश ते पच्छमी उत्तर प्रदेश च भारी थमां भारी बरखा पौने दी पेशगाई कीती ऐ। छत्तीसगढ, पूर्वी मध्य प्रदेश, झारखंड, कोंकण, गोवा, मध्य महाराष्ट्र, उत्तराखंड, पच्छिम बंगाल ते उत्तरपूर्वी राज्यें च अज्ज हल्की थमां भारी बरखा पौने दा अनुमान ऐ। मौसम विभाग नै जम्मू-कश्मीर, उत्तराखंड, पंजाब, हरियाणा ते दिल्ली च बी अज्ज हल्की बरखा पौने दी पेशगोई कीती ऐ।

<><><><><><>